

'Pakatan sulit DAP-PAS tidak jejaskan Barisan'

Oleh JAMALUDIN BAKAR

PAKATAN sulit DAP-PAS tidak sedikit pun m e n j e j a s kemenangan besar Barisan Nasional dari segi kerusi yang diperolehi dalam pilihanraya umum ini nanti.

Perdana Menteri, Datuk Seri Dr. Mahathir Mohamad menegaskan, pendedahan yang dibuat oleh Barisan Nasional terhadap "pakatan sulit" kedua parti itu bukan disebabkan BN bimbang terhadap kesannya tetapi untuk memberitahu umum betapa kotornya permainan politik PAS-DAP itu.

"PAS yang mendakwa sebagai parti Islam sering mensifatkan bekerjasama dengan orang kafir itu tidak baik dari segi Islam.

"Tetapi sebaliknya parti itu mengadakan pakatan sulit untuk mengelirukan pengundi-pengundi Islam yang benar-benar berjuang untuk Islam.

"Pakatan ini perlu dibongkar bagi memastikan pengundi-pengundi Melayu dan Islam tidak tertipu dengan propaganda yang dibuat oleh PAS yang semata-mata berjuang untuk kepentingan diri mereka sendiri," tegas Perdana Menteri.

Jentera

Dalam pilihanraya umum 1978, DAP memperoleh 15 kerusi dan PAS lima kerusi Parlimen.

"BN akan berjaya memenangi kerusi yang dimenangi oleh PAS dan DAP dalam pilihanraya lalu memandangkan kesedaran rakyat terhadap parti pembangkang yang tidak mampu berbuat apa-apa itu," jelas Datuk Seri Dr.

Mahathir, yang juga Pengerusi Kebangsaan Barisan Nasional.

Mengenal jentera parti Berjaya yang digunakan untuk menyokong parti bebas bagi menentang calon BN dari USNO di Sabah, Datuk Seri Dr. Mahathir berkata:

"BN akan mengambil tindakan tegas terhadap anggota komponen yang menyokong calon bebas dalam pilihanraya umum kali ini."

"Arahan supaya parti komponen jangan membantu mana-mana calon bebas adalah jelas dan sebarang parti yang melanggar arahan tersebut akan diambil tindakan.

Sokongan

"Masalah ini akan diselesaikan sesama parti komponen Barisan Nasional melalui rundingan," jelas beliau.

Lima calon bebas, dikatakan disokong oleh Berjaya menentang calon USNO yang bertanding atas tiket Barisan Nasional di lima kawasan Parlimen di Sabah.

Mereka ialah bekas Ketua Pemuda Berjaya, Haji Yahaya Lampong—orang kepercayaan Ketua Menteri Sabah, Datuk Harris Salleh, bertanding di Kota Belud.

Empat lagi, Encik Abdillah Abdul Hamid (Silam), Encik Yusof Yakob (Hilir Padas), Encik Hasan Albam (Labuk Sugut) dan anak Allahyarham Ketua Menteri, Tun Fuad Stephens, Haji Effendy Stephens (Marudu).

USNO dijangka akan menghantar bantahan rasmi kepada Barisan Nasional terhadap sokongan Berjaya kepada calon bebas tersebut.